

Alma Felić

Sarajevo, Bosnia and Herzegovina

## HISTORIJSKA TRAGANJA (2008–2015)<sup>1</sup>

Na sjednici Naučnog vijeća 2008. godine, usvojen je prijedlog Instituta za istoriju iz 2007. godine o pokretanju časopisa *Historijska traganja* s obrazloženjem da "Cilj izdavanja još jednog časopisa, pored Priloga Instituta za istoriju u Sarajevu, jeste upoznavanje s novim istraživačkim radovima zasnovanim na arhivskoj građi, ali i objavljivanje preglednih radova u formi sintetiziranih saznanja za neko periodizacijski zaokruženo razdoblje. Časopis je otvoren i za zanimljive teoretske članke koji mogu pomoći u historiografskim istraživanjima."<sup>2</sup>

Glavna i odgovorna urednica časopisa *Historijska traganja* od njegova osnivanja zaključno sa 16. brojem bila je dr. Vera Katz.

Časopis od samog objavljivanja ujednačeno izlazi dva puta godišnje. Ukupan korpus časopisa sastoji se od šesnaest (16) brojeva. Časopis je dostupan u štampanoj formi, ali i u elektronskom obliku na stranici Instituta za istoriju ([www.iis.unsa.ba/izdavastvo.html](http://www.iis.unsa.ba/izdavastvo.html)), s tim da za trinaesti, četrnaesti, petnaesti i šesnaesti broj nije dostupan cjelovit .pdf na službenoj web prezentaciji istog.

Časopis je prvotno podijeljen u dvije rubrike: *Članci i Predavanja sa Tribine Instituta za istoriju u Sarajevu*, ali kasnije se javljaju i rubrika *In memoriam*, kao i rubrika *Reagiranja*. Bibliografije časopisa *Historijska traganja* sadrži, pored navedenih, i rubrike: *Bibliografija*, *Okrugli sto*, te *Izložba*.

Časopis nije geografski ograničen na Bosnu i Hercegovinu i objavljuje priloge autora i izvan Bosne i Hercegovine, pa su svoje radove u Časopisu objavili

<sup>1</sup> Ovaj rad predstavlja djelimično modifikovanu verziju dodiplomskog rada pod nazivom "Bibliografija časopisa *Historijska traganja* (2008–2015)" koji je odbranjen na Odsjeku komparativna književnost i bibliotekarstvo Filozofskog fakulteta Univerziteta u Sarajevu, u mentorstvu doc.dr. Lejle Hajdarpašić.

<sup>2</sup> Katz, Vera; Ličina-Ramić Aida. Deset brojeva historijskih traganja (2008–2012), časopisa Instituta za istoriju u Sarajevu.. *Historijska traganja*, 10, 2012. str. 233–257

i autori iz Hrvatske, Srbije, Turske, Francuske, SAD, Kanade, Austrije, Njemačke, donoseći odgovore na brojna pitanja koja se tiču prošlosti Bosne i Hercegovine. Unutar ovog časopisa objavljuju se izvorni naučni radovi, pregledni radovi, stručni prilozi, te autorizirana predavanja održana na *Tribini Instituta za istoriju u Sarajevu*.

Također, časopis *Historijska traganja* nije tematski ograničen i sadrži radove koji se odnose na antičku povijest, srednjovjekovnu Bosnu, historiju osmanskog perioda, teme koje se bave povijesnom problematikom 19. i vremenom s početka 20. stoljeća, Bosna i Hercegovina u vrijeme austrougarske uprave, Prvi svjetski rat i međuratno razdoblje (od 1914./1918. do 1941. godine), Drugi svjetski rat, period pred agresiju (angažirani radovi Borisa Nilevića), radovi o obrazovanju, društveno-političkim uređenjima i društvenim promjenama, zatim dva rada historičara Marka Pijovića o problematici identiteta i demistificiranju "etniciteta", radovi predstavljeni na okruglom stolu pod naslovom *ZAVNOBiH – pogledi iz nove perspektive*, radovi o Crkvi bosanskoj i njezinoj ulozi u bosanskom društvu.

Prvi i drugi broj časopisa imaju redovne rubrike *Članci* i *Predavanja sa Tribine*, dok u trećem broju dolazi do izostajanja redovnih rubrika zbog predstavljanja radova sa okruglog stola održanog pod naslovom *Godina 1918. – bosanskohercegovačko iskustvo*. Također, u okviru ovog broja, objavljen je i prikaz izložbe pod naslovom *Bosna i Hercegovina 1918. godine*<sup>3</sup>. U četvrtom broju, pored redovnih rubrika, pojavljuje se i rubrika *In memoriam* posvećena akademiku *Enveru Redžiću (1915 - 2009)*.<sup>4</sup> Peti broj donosi radove Borisa Nilevića i o Borisu Nileviću, odnosno radovi koji su uvršteni u rubriku *Članci* zapravo predstavljaju izbor iz njegove bibliografije, dok rubrika *Predavanja sa Tribine* donosi osvrt na njegov znanstveni opus ili uspomene na Borisa Nilevića. Nakon redovnih rubrika *Članci* i *Predavanja sa Tribine*, predstavljena je i *Bibliografija prof. dr. Borisa Nilevića (1947 – 1999)*<sup>5</sup>, koju je priredio Esad Kurtović. Rubrika *Predavanja sa Tribine* izostaje u šestom, sedmom i osmom broju. Deveti broj prezentira pet radova i jedno izlaganje u rubrici *Predavanja sa Tribine*, dok u desetom i jedanaestom broju opet izostaje rubrika *Predavanja sa Tribine* i tako će biti do šesnaestog broja Časopisa. U dvanaestom broju prezentirano je četrnaest radova, predstavljenih u rubrici *Članci*, sa okruglog stola *ZAVNOBiH – pogledi*

<sup>3</sup> Rodinis, Andrej. IZLOŽBA: Bosna i Hercegovina 1918. godine. *Historijska traganja*, 3, 2009. str. 237 - 255

<sup>4</sup> Išek, Tomislav. In memoriam: akademik dr. Enver Redžić (1915-2009). *Historijska traganja*, 4, 2009. str. 229 - 231

<sup>5</sup> Kurtović, Esad. Bibliografija prof. dr. Borisa Nilevića (1947 – 1999). *Historijska traganja*, 5, 2010. str. 265 - 276

iz nove perspektive, a predstavljen je i rad Nedima Rabića o akademiku Marku Šunjiću, povodom petanest godina od njegove smrti.<sup>6</sup> Trinaesti i četrnaesti broj donose nekoliko članaka, a u petnaestom, pored rubrike *Članci*, posljednji prilog je komentar Adnana Jahića na objavljeni magistarski rad Edina Omerčića u broju 13, čime se otvara nova rubrika u časopisu – *Reagiranja*. Šesnaesti broj donosi šest članaka u rubrici *Članci*.

Sadržaj časopisa “Historijska traganja” referiraju i prenose: *CEEOL – Central and Eastern European Online Library*, Frankfurt am Main /<http://www.ceeol.com/> i *EBSCO Publishing*, USA.

Bibliografija iz ovog rada počinje na 173. strani.

<sup>6</sup> Rabić, Nedim. Naučno djelo Marka Šunjića – povodom 15 godina od smrti. *Historijska traganja*, 12, 2013. str. 269–296.